

I - ARABAKO BATZAR NAGUSIAK ETA ARABAKO LURRALDE HISTORIKOAREN FORU ADMINISTRAZIOA

Arabako Foru Aldundia

EKONOMIA GARAPENAREN ETA LURRALDE OREKAREN SAILA

Foru Gobernu Kontseiluaren 207/2019 Erabakia, martxoaren 26koa. Onestea Foru Aldundiak kontribuzio berezia ezar dezala 2019ko ekitaldirako, su itzaltze eta salbamendu zerbitzua jarri, hobetu edo handitzeko

Abenduaren 20ko 16/2010 Foru Arauak, su itzaltze eta salbamendu zerbitzua jarri, hobetu edo handitzeko Arabako Foru Aldundiaren kontribuzio berezia arautzen duenak, bere 8.2 artikuluan xedatzen du Foru Gobernu Kontseiluak onartu behar duela kontribuzio berezia ezartzen eta antolatzen duen erabakia, zeren eta, urtero sortzen den zerga bada ere, ezinbestekoa baita zehaztea ekitaldi bakoitzean kuotak kalkulatzeko baliatuko den zerga oinarria.

Kontribuzioaren zerga gaia da subjektu pasiboek onura lortzea obrak egiteagatik edo Arabako Foru Aldundiak Prebentzio, Su Itzaltze eta Salbamendu Zerbitzua jarri, hobetu eta handitzeagatik. Zerga oinarria da zerga gaia egiteagatik Arabako Foru Aldundiak guztira urtero jasaten duen kostua. Sortzapena, aurrez ikusitako kostuari lotuta, ekitaldi bakoitzeko urtarri-laren 1ean izango da; hain zuzen ere, Arabako Lurralde Historikoaren aurrekontuei buruzko urteroko foru arauan obrak gauzatzeagatik edo Arabako Foru Aldundiak prebentzio, su itzaltze eta salbamendu zerbitzuak jarri edo handitzeagatik; ondoren, egokia bada, likidatu egingo da.

Bestalde, kontuan izanik Arabako Lurralde Historikoko aurrekontuen luzapena aplikatzeko irizpideak finkatzen dituen abenduaren 28ko 71/2018 Foru Dekretuak 8.1 artikuluan ezarritakoa, 2019ko ekitaldirako aurreikusitako inbertsio garbien kostua lortzen da, zeina 991.736,58 eurokoa baita.

Subjektu pasiboak dira, bereziki onuradun direlako, Arabako lurralde historikoan, Gasteizko udalerrian izan ezik, zenbait arrisku babesten dituzten polizak kontratatuta dauzkaten aseguru etxeak.

Arabako lurralde historikoan aurre-aurreko urtean batu diren primen proportzioan banatuko dira aipatu diren arriskuak babesten dituzten aseguru etxe edo erakundeei eskatu ahal zaizkien kuotak, goi muga batutako primen ehuneko 5 delarik. Kalkulu horretatik kanpo geldituko dira Gasteizko udalerrian arrisku horiek estaltzen dituztenak.

Arriskuak babesten dituzten aseguru etxe edo erakundeen elkartekin hitzarmenen bidez bildu ahal da kuota, behar bezala baimendutako ordezkariak aurretik eskatuta. Hasiera batean, kudeaketa erraza zelako eta diru sarreretan egonkortasuna zegoelako, formula hori da biltzeko egokientzat jo zena. Ondorioz, Toki Administrazioaren eta Lurralde Orekaren Saileko foru diputatuaren uztailaren 6ko 348/2011 Foru Aginduaren bidez, UNESPA aseguru enpresa elkartearekin hitzarmen bat izenpetu zen, 2011rako. Hitzarmen hori luzatu zitekeen hurrengo ekitaldietara.

Dena den, aseguru etxe guztiak UNESPAren baitan ez daudenez gero, eskatu egiten zaie foru arauan aipatutako arrisku babestu horiek dituzten eta itunak kudeatzeko erakundekoak ez diren aseguru etxeei aurkez dezatela 2018. urtean bildutako primen zenbatekoaren aitortpena.

Ondoren, jasotako argibideetan oinarrituta, foru arauan xedatutakoaren arabera (Arabako Foru Aldundiaren hasierako aurrekontua, primen proportzioa eta primen ehuneko 5), likidazio proposamena bidaliko zaie aipatutako aseguru etxeei, nahiz eta aseguru etxeei behin-behineko likidazioak bidali aurretik UNESPA aseguru etxeen elkartearen bidez haiek bildu ahal izan, eta horretarako ahalmena ematen zaio Diputatu nagusiordea eta Ekonomia Garapenaren eta Lurralde Orekaren Saileko foru diputatuari.

Horregatik guztiagatik, Ekonomia Garapenaren eta Lurralde Orekaren Saileko foru diputatuaren proposamenez, eta Foru Gobernu Kontseiluak gaur egindako bilkuran gaia aztertu ondoren, hau

ERABAKITZEN DUT

Lehenengoa. Onestea Arabako Foru Aldundiak kontribuzio berezia, 991.736,58 euroko zerga oinarrikoa, ezartzea 2019ko ekitaldirako, su itzaltze eta salbamendu zerbitzua jarri, hobetu edo handitzeko.

Bigarrena. Ekonomia Garapenaren eta Lurralde Orekaren Saileko diputatuari ahalmena ematea, itunak kudeatzeko erakundeari atxikitako konpainiek sortutako aseguru sariak hark UNESPArekin indarrean daukan itunaren arabera likidatzeko.

Hirugarrena. Itunak kudeatzeko erakunde horretakoak ez diren aseguru etxeei eskatzea 2018an bildutako sarien zenbatekoaren aitortpena aurkez dezatela, baldin eta foru arauan aipatutako arriskuak babesten badituzte eta, Gasteizen izan ezik, Arabako lurralde historikoko beste herriren batean badihardute.

Laugarrena. Erabaki hau ALHAOn argitaratzeko agintzea.

Gasteiz, 2019ko martxoaren 26a

Diputatu nagusia

RAMIRO GONZÁLEZ VICENTE

Diputatu nagusiordea eta Ekonomia Garapenaren eta Lurralde Orekaren Saileko diputatua

MARIA PILAR GARCIA DE SALAZAR OLANO

Lurralde Orekaren zuzendaria

IÑAKI GUILLERNA SAENZ